



05 OCT, 2020

Sukar cari kerja, Humairah teruskan legasi datuk

Utusan Malaysia, Malaysia

Page 1 of 2

Sukar cari kerja, Humairah teruskan legasi datuk

MARANG: Menceritakan sejarah asal perniagaannya, pemilik dan pengasas Tokkikiter Enterprise, Humairah Mohd. Nasir berkata, pembuatan kopi tersebut bermula secara perusahaan belakang rumah oleh datuknya, Seman Ibrahim pada 1986 di Dungun, Terengganu dengan menggunakan kaedah tradisional iaitu dimasak menggunakan kayu api.

Katanya, bermula 1999, datuknya beralih arah menggunakan mesin sebelum dia dan suami, Mohd. Mustakim Mohd. Kasturi, 35, mengambil alih operasi perniagaan dengan membuka kilang di Bukit Gasing, Marang pada 2016 sekali gus menjenamakan minuman tersebut sebagai Tokkikiter.

Menurut Humairah, sepanjang tempoh 1986 hingga 2016, kopi datuknya itu tidak mempunyai sebarang jenama dan sekadar dibungkus dalam plastik untuk jualan di pasar-pasar dan kedai runcit sekitar Dungun sahaja.

“Dahulunya produk tokki (datuk) cuma kopi kampung yang dijual di pasar, jadi kami mahu memberi nafas baharu agar kopi ini dapat dikenali di mata dunia dan dari situ lah tercetusnya idea untuk mengkomersialkannya sebagai Tokkikiter yang dalam bahasa Terengganu bermaksud datuk kami.

“Berbekalkan modal RM 30,000 milik sendiri kami membuka perniagaan suluang dengan beroperasi di kilang yang terletak di Kampung Bukit Gasing di sini meng-

gunakan mesin milik tokki di samping turut mendapat bantuan geran dan khidmat nasihat daripada pelbagai agensi kerajaan termasuk Jabatan Pertanian, Lembaga Pemasaran Pertanian Persekutuan (FAMA) dan Yayasan Pembangunan Usahawan Terengganu (YPU),” katanya.

Lulusan sarjana dalam bidang bioteknologi dari Universiti Malaysia Terengganu (UMT) itu berkata, dia terpanggil untuk meneruskan legasi datuknya bagi memastikan kopi turun-temurun tersebut terus diwarisi selain untuk mengatasi masalah pengangguran yang dihadapinya sejurus tamat pengajian.

“Kekangan usia dan faktor kesihatan menyebabkan tokki tidak mampu meneruskan perniagaannya lagi dengan anak-anak yang masing-masing mempunyai pekerjaan sendiri. Jadi sebagai cucu, saya rasa bertanggungjawab untuk mewarisi perusahaan ini kerana tahu potensinya dapat dikembangkan.

“Sebagai siswazah menganggur dan sudah melalui kesusahan mencari kerja, saya fikir mungkin perniagaan ini dapat menjadi medium untuk saya membuka peluang pekerjaan kepada orang lain yang turut berdepan masalah sama,” katanya yang berhasil mengambil dua pekerja

bagi membantu urusan perniagaan berkenaan.





05 OCT, 2020

Sukar cari kerja, Humairah teruskan legasi datuk

Utusan Malaysia, Malaysia

Page 2 of 2

SUMMARIES

MARANG: Menceritakan sejarah asal perniagaannya, pemilik dan pengasas Tokkikiter Enterprise, Humairah Mohd. Nasir berkata, pembuatan kopi tersebut bermula secara perusahaan belakang rumah oleh datuknya, Seman Ibrahim pada 1986 di Dungun, Terengganu dengan menggunakan kaedah tradisional iaitu dimasak menggunakan kayu api. Katanya, bermula 1999, datuknya beralih arah menggunakan mesin sebelum dia dan suami, Mohd. Mustakim Mohd.